

國
朝
詩
鐸

國朝詩鐸卷二十一

錢唐張應昌仲甫

家訓

尹繼善誠子尊屋詩見止足門

訓子詩

沈青崖

文章本餘力品行貴先端幼儀宜循矩少學勿躐班奉
持遵師訓恭順承慈顏氣揚常自抑性猛濟以寬小忿
逞螳臂急患蹴雞丸徒開一朝釁且貽終身訕玩物志
必喪惜陰刻靡閒嬉戲終無益謔浪恆失歡大智友木
石小慧好雕砵所以不器品往往鎮如山生機濟蟻發

推已埋蛇難

宋祁叔敖二事卽仁之發恕之推也

仁溥因物驗恕約反身

觀持躬寶金玉樂羣親芝蘭愆從乾候起惠結皎餘歡
卑下勿凌轢勢燄勿援攀自視勿驕侈施予勿吝慳舉
止詞色婉周旋度數爛言動世無阻和平心亦安扶風
書戒子橫渠銘訂頌裁詩作訓語寄汝晨夕看盡心體
交誠承家鞏石磐

鳳凰篇

戒子弟也

古風十四首之一

陳兆崙

鳳皇雖德禽謀身視所棲非惟棲欲擇無食亦苦飢因
緣得梧竹毛羽生光輝光輝照園池衆鳥不敢啼鳳老
雛已長冠距殊相仿竹葉苦不甘桐陰苦不爽枳棘恣

閒遊腐鼠膾一享文衣寢垢傲野性重敞惘西隣有鴛
鴛拖抄隱岩阿生兒挺奇骨來假碧樹柯阿閣分餘糧
一舉橫空摩爭誇異凡鳥胎化良足多回頭視老鳳容
色空蹉跎

誠子詩

金 姓

白屋修朱門朱門仍白屋本自霄壤懸興替一何速稔
惡斯取災樹德乃致福惴惴保其身克家勤式穀
芝草良有根仙田播嘉種如何驥德稱生駒駕偏躔故
知純袴習生小慣席寵清白猶失傳况乃本闕爨

家誠

錄三十
二首

又

立身惟樹德大本在倫常忠孝揭日月豈待言說詳其餘多節目法戒各有當臚舉俾聰聽庶幾知否臧

兄弟託分形亦參三樂首共戴者君親聯行若朋友構釁故多端豈獨由夫婦相好莫相尤友恭兩無負

相憐復相捐恩義常不卒夫婦朋友間谷風怨如一追惟致此故未判誰得失但教兩分過那不人言恤

至誠絕擬議發策占中孚豚魚猶可感况乃斯人徒五行配五事惟信爲根株命駕失輓軌得驅尺寸無

民生良在勤惜陰自神禹晝寢片時安嚴師訶糞土幸知懲惰廢尙可就拙補鳴雞解人意催起續更鼓

讀書期致用。一言可終身。博學轉多助。歷架非空陳。何物益神智。破暗資傳薪。精心窺古鑑。經濟行紛綸。

志學古今異。利重義則輕。古人爲道德。今人爲科名。天爵長自保。倍增人爵榮。相沿忘歸宿。分道不竝行。

言者心之聲。詩文尋正脈。險怪與酸寒。屏棄不足惜。豈徒失體制。應亦少福澤。夫惟大雅才。誦法永不易。

富貴非吾願。未易語庸俗。隨流且平進。安分宜止足。鷓鴣與鷓鼠。薄取愜所欲。何必兩疏翁。方能辨榮辱。

曾游芝蘭室。更歷鮑魚肆。懷芳薰德深。逐臭腥聞異。親賢本無難。比匪乃尤易。鼻觀可借參。於焉審趨避。

言行總樞機脫口勢尤急借曰玷可磨常苦駟不及憑
誰作監史想像金人立甯使諂寒蟬無爲騁捷給
失身在不密疎脫惟禍梯敬慎乃無敗後悔徒噬臍周
防或少懈罅漏呈端倪驚心水工語蟻穴潰虹隄
曾聞謙受益天道常虧盈有富適招怨有才偏致爭重
之以驕傲厝火仍召兵君看宥坐器未滿終不傾
精神貴寶嗇財賄宜疏通百物皆取給專利怨所叢周
卹幸有藉庶幾甘苦同不思貧窶日曾叩富家翁
服飾表儀容無爲尙華侈新樣競趨時更成輕薄子羔
裘素絲詠千載猶歸美豹烏與鷓冠掇禍乃如彼

履屐得位置。便堪覘將才。一室不掃除。天下何望哉。衛
武湯蠻方。庭內無纖埃。鼠跡有何好。闕冗良足咍。
氣可塞天地。橫決徒罹憂。譬如百川漲。頓遣金隄浮。制
之在斂抑。齒剛輪舌柔。忍心此爲最好。爲忠義留
口腹。小人養已失飲食。正君子遠庖厨。用物盡物性。奈
何一箸下。萬錢勦生命。後嗣被餘殃。先見猶稱聖。
犀革猶可穿。不能勝酒力。在禮失威儀。在言乖語默。聖
人飲無量。所重惟溫克。莫羨竹林賢。昏酣誇頌德。
九女傳禮經。遂開漁色寶。廣嗣祇空言。召災仍促壽。何
必喬知之。方踵石崇後。正恐閨門中。亂羣同烏獸。

十愆初致儆其一比頑童始知造商邑蚤慮有秦宮倡
優真下賤尊酒樂與同徘徊歌舞地宛轉帷簿通

天地凜肅殺醞釀迴春溫云何恣刻害蓄念常少恩及
身中陰禍流毒貽子孫有客望其氣徒見愁雲繁
不亢亦不卑持身乃無忝媿嬰自摧屈菱角磨成茨本
欲媚纖人時或遭嗤點中尉足何香翻教罵奴詔

卜宅獻周公圖墓驗構里傳作形家言慎重良有以改
築旣傷財爭訟亦時起營葬遂無期尤爲廢喪紀
脈理至精微岐黃皆上聖侍疾與衛生正須辨藥性於
人強干預妄語促其命庸醫不足誅何必子爲政

蒙養定終身姑息一生了情性蚤調平艱難須預曉乖
戾禍機藏情偷生計少得志亦罹殃沈淪眞餓殍

七歲不同席一家猶且然況在諸姻族并無蘿蔦牽有
言不越閫覲面胡得焉嫌疑須早避慎之笄冠年

娶婦與擇婿所重惟才賢勿徒羨門閥况乃貪金錢一
室少雍睦兩家增過愆旋聞責言起如誦行野篇

馭下必以嚴恩慈固應有念此亦人子驅策惟可受鞭
笞不勝痛狂馬時決驟赫赫大將軍竟斃膳奴手

求雌亦求牡詩詠野雉鳴民生實有欲貴賤非殊情童
奴及黷妾甯待私合并咸使遂人道草間無棄嬰

教子必有成授徒責斯大寬縱任遨嬉筆削聊掩蓋良材作棄物厥父母何賴罪比絕人嗣晏然忘後害嚴城尙重閉況在庭戶間外既可禦暴內亦可防姦晨昏謹管鑰權不由當關釀禍起馳逐非是無往還

示兒仲方

莊肇奎

置身餓死後能生從此淮陰悟用兵學做英雄須豁度要擔忠孝必癡情便宜到手防生患恥辱臨頭忍不爭縱使有才謙更好著些滿意便無成

示家人

趙嘉程

處家惟忍字應物在虛衷勿以貧爲病須知巧易窮門

衰因戾氣第吉布和風。骨月休生隙。房幃漫起戎毀傷。
由漸積得失察微蒙。但使心如鏡。何妨耳似聾。率勤常
早起合力倍成功。婦子同相勗。堂基自此隆。

示諸子

錄五首

陳寅

履薄臨深到處逢。常思集木著温恭。富猶多怨貧何傲。
善不能爲惡豈容。廿二史中懸古鏡。十三經內聽晨鐘。
兒曹莫笑前人拙。一句書成百祿宗。

塵務空惚志易煩。試將沈靜養心源。達人眼曠空無物。
吉士神清妙不言。鬧市勿聞車馬過。虛堂如聽海濤喧。
天懷澹定隨時合。閉戶疑遊獨樂園。

奢靡縱欲究何涯。紈袴生成豈克家。味美偏嫌無下箸。
衣鮮遺羨有新花。石城歌舞雲中夢。金谷樓臺塞外沙。
澹泊自饒千古趣。最清涼處是繁華。

奴僕愚騃事未諳。殷勤訓誨莫相參。嚴霜烈日階簷立。
冷炙殘杯涕淚含。詈罵及身情尙可。鞭箠到骨體何堪。
彼猶人子當平相。好與當家說再三。

百族雖殊造物平。尋常無故莫傷生。白龜化石存良將。
黃雀銜環啟大名。箭激吳唐償鹿子。刀除章道報魚羹。
緣知暴殄招神怒。莫逞貪饕縱割烹。

訓子四箴

汪繼培

敬先

奕奕斯堂世德流馨傳紀頌賦歌贊箴銘乞言卅載稽
拜涕零前芬是誦後嗣之型猗歟我祖陟降在庭繩繩
勿替敬妥先靈

藏書

貽孫有穀書爲良田稽古有獲是謂豐年可以永世可
以樂天。儲藏匪易賣文之錢來無不義書難求全勿散
勿褻庶永吾傳

守身

吉士守身嚴於處女遠嫌慎微動循規矩青蠅玷圭辱

不在鉅甯介毋隨勿狂與腐小人所譏君子所取徇物者愚人貴自樹

治家

克振家聲務本爲大姻莫繫援交毋向背勿吝而鄙勿夸而泰重學尊師守常遠怪御下宜寬睦鄰須耐要言不煩此其大概

王壽康題課讀圖詩見讀書門

陳來泰題莎廳課讀圖詩見世祿門

婦誠三首

閩媛李毓清

出嫁事舅姑恩義同父母云何事人親因我爲人婦天

合使之然順逆視所受愛子多愛媳慈愛什八九愛者
情之常不愛事之偶不問慈愛無問我能孝否竭吾事
親心可以占无咎出入敬扶持奉養勤左右祀先肅蘋
繁宴客潔漿酒服勞本婦職勿厭執箕帚姆妯須和顏
姑叔莫多口持躬務勤儉接物尙寬厚二從徵婦德百
行孝爲首作善天降祥積慶裕爾後

夫爲妻之綱妻亦與夫齊敵體均伉儷恩愛兩不疑紅
絲一繫足終身不更移無違著聖訓至順昭坤儀男以
剛爲貴女以柔爲宜雞鳴切戒日舉案思齊眉肯效不
賢婦琴瑟乖唱隨悍戾與嫉妬不顧衆口嗤常諧偕老

歡匪徇牀第私變守柏舟操益堅冰雪姿古來多淑媛
一一垂芳規賢豪克樹立半出內助資翟弗荷光寵彤
管揚休辭人生寄一世百年有盡期惟留不朽名萬古
恆在茲

爲孝苦不足爲慈苦有餘愛而不知勞禽犢之謂歟女
則課紡績男則課詩書課女與課男父母心非殊高樓
時平地植基恆於初孟母切教子斷杼三移居良田不
耕耨沃土成荒蕪勿謂此父職有咎豈在予撫摩過姑
息玩好隨嬉娛飾非代隱疚揚善加虛譽庭內日蒙蔽
鄉隣空嗟吁是謂賊其子厥罪當何如賢母篤義訓心

殫志自舒熊九佐苦讀禰戒申芳模上可答祖宗下可
光門閭

勗恆兒

王繼藻

婦人無能爲所望夫與子撫子得成立私心竊自喜望
子修令名書香繼芳軌爾質非愚頑爾年雖稚齒爲學
愼厥初成人貴在始高必以下基洪必由纖起愼毋貪
嬉遊流光疾如駛愼毋恃聰明自作遼東豕璞玉苟不
琢徒然負質美所以古哲賢競此分寸晷如彼藝兩畝
及早勤耒耜我力旣殷殷我黍必薿薿積土成邱山愼
毋一簣止心專功必成志堅事不靡我非孟氏賢母教

成三徙又無積累德敢冀拾青紫惟念祖澤存庶幾免
邪侈男兒當自強立志在經史或可光門閭得以承祖
祀負荷良非輕毋遺先人恥力學不早圖悔之亦晚矣

勗兒作

張藻

讀書裕經綸學古法政治功業與文章斯道非有二汝
宦久秦中洵膺封圻寄仰沐 聖主慈 寵命九重賁
日夕爲汝祈冰淵慎惕厲警諸樽櫨材斲小則恐敝又
如任載車失誠則懼躓捫心五夜慙報答奚所自我聞
經緯才持重戒輕易教救無煩苛廉察無猥細勿膠柱
糾纏勿模稜附麗端已勵清操儉德風下位大法則小

廉積誠以去僞西土民氣溇質樸鮮糜費豐鎬有遺音
人文鬱炳蔚况逢郅治隆陶鈞綜萬類民力久普存愛
養在大吏潤澤因時宜擢節善調理古人樹聲名根柢
性情地一一踐履真實心見實事千秋照汗青今古合
符契不負平生學不存温飽志上酬高厚恩下爲家
門庇吾家祖德貽箕裘罔或墜痛汝早失怙遺教幸勿
棄歎我就衰年垂老筋力瘁曳杖看飛雲目斷秦山翠

示兒

襄城李氏

俗儒豔浮榮爭先趨青紫冊惟珍兔園高閣東經史一
旦際風雲表見將何以汝曹生天中居近伊洛水緬彼

兩大賢清風流鄉里。瓣香兼鏤膺庶洗。紉生恥吾雖巾
幘流。爾說毛。喜勉矣。趁朝嗽。駒光不我與。

示兒

莊德芬

吾聞燕國公。爨火照書策。范相未遇時。帳中盈烟迹。貴
盛相門兒。貧賤無家客。青雲與泥塗。勤苦同一轍。志學
抱堅心。豈爲境所易。誦讀知其人。尙友若咫尺。流光駒
過隙。分陰抵拱璧。毋令寡母心。戚戚憂乾沒。

閨訓篇

汪嫫

男兒希聖賢。女亦貴自立。禮義與廉恥。四維毋缺一。千
秋傳女宗。在德不在色。無德才曷取。德厚才自軼。我誦

三百篇多出婦人筆。王化起閨門。性情貴醇壹。男忠偕女節。要各用其極。人生順境少。處順宜自識。家範森以嚴。主饋修內則。富貴戒驕奢。貧賤忘抑鬱。古人樂天命。無往不自得。容貌肅端莊。笑顰氣安輯。長舌維鴈階。多言不如默。勤勞采藻蘋。靜好御琴瑟。舅姑比父母。孝養情汲汲。曲折體慈懷。乃能盡其力。善處骨月間。和氣生一室。不幸失所天。無言自悲泣。生死權重輕。撫孤先務亟。坤道利永貞。固窮志不惑。避嫌嚴瓜李。防微謹門闕。保始更慎終。姓名香可裊。教子有義方。父師皆母職。一朝能顯揚。芳烈歐陽匹。女子賴師教。考亭言足述。蒙養

自少時定性嚴所習。三從義定衡。四子書洞悉。經史苟
旁通。萬卷盈胸臆。偶爾歌詠志。無邪協詩律。敦厚而溫
柔。樸雅去雕飾。亦足抒性真。匪求名譽溢。有女養闈中。
莫使耽安逸。施衿結褵時。欲學嗟無及。

讀呂新吾先生闡範題辭

石承楣

自昔陰陽教化同。編摩何止及深宮。應知孝婦貞媛節。
卽是仁人志士衷。

六經精液史膏腴。薈萃何如四子書。兩字聖賢垂訓切。
修齊原不外家居。

刪書斷自唐虞始。釐降觀型有二妃。此後色荒留誥誠。

興亡三代盡官幃

豈獨關雎譜樂章風詩十五半閨房卽論雅頌歌朝廟
一一鋪陳闡教良

諷詠誰能妙義探分明比興賦兼三由來王化閨門始
聖訓傳家祇二南

秦漢而還著述多更生列傳創編摩百家勸善懲淫語
都爲閨門釀太和

先生學術本精純實政呻吟著述勤更爲閨門留懿範
六經諸史百家文

是書前爲嘉言采六經及女誠諸編後爲善行女學婦德母道皆經史事

深文奧義煩音釋棘句鉤章費削除安得賞奇疑亦析

世間兒女盡知書

是書徵引本事原文
深奧者畧爲變易

格言名論

寡言

朱經

隴山多飛鳥，翱翔適其生。鸚鵡誇能言，樊籠苦拘縈。鐘鼓懸太常，考伐聲鏗鏘。不叩而自鳴，羣謂之妖聲。吉人以行重，躁人以舌輕。緬懷磨兕堅，守口心怍怍。

責己

又

勿謂寸陰短，既過難再獲。勿謂一絲微，既緇難再白。赴善登崇山，寡過掃塵積。一日省一愆，三月未盈百。責人不肯恕，責己每自匿。願言砥廉隅，此身敢虛擲。

惜日

又

江河日流注難挽東逝波羲和日奔馳難回魯陽戈終日但飽食冉冉歲月過此後悔失時荒耄無如何浮游水上萍奄忽霜餘莎勉旃復勉旃慎無悲蹉跎

立身

沈德潛

人之立身貴挺貞幹素絲染黑色難回換未協中行毋狂甯狷狂可僞爲狷能自斷勿云混茫躋登有岸百里爲程九十猶半

謹言

又

出言不慎禍機所伏良言溫和惡言虐毒以口戕口悖

無不復守口如瓶防瓶傾覆後悔已遲前愆當贖金人
三緘勉哉自勵

退讓

又

人思上人爭端斯起。齧齧啾啾。攢如蟲螿。明禮習讓。力
行身體同田讓。畔同行讓趾。六鷁退飛。同步準此終身。
讓人師朱仁軌

改過

又

盡善良難得過。偶誤護過過積。病人沈痼。有則改之。跣
回舜路。萬里路分。曩時失步。勇行勿憚。自強莫怨。秦穆
榮懷賢由悔悟

有所思行

趙嘉程

宇宙本勞人。吉士安所止。攘攘羈塵中。焉能有全美。貧賤不足悲。富貴不足喜。無者有之終。虧者盈之始。曾不轉瞬間。陳新相代起。我嘗愛古人。稱有榮期子。帶索而行歌。九十不爲恥。又嘗有達夫。淵明號高士。五斗不折腰。乞食向隣里。處盛但欲然。藏深與虛似。富貴詎能淫。貧賤詎能徙。悠悠世間人。誰堪味其旨。

詠懷

陳寅

造物亦多事。萬人各其面。各面各其心。中藏不可見。當其初發時。誰不欲好善。一入名利途。瞬息雲雨變。生死

情不渝卓哉青雲彥

春夏多和風萬物暢生意秋冬多烈風羣類失所庇造化原無心生人性遂異繫彼暴戾人一身盡苦刺宇宙本有情置躬竟無地何不養太和稍得春夏氣

室中一星火能令萬物灰口中一言失遂致終身災出話良甚易迅疾如風雷矢發在弦上一去不可回豈不快喉舌無乃成禍胎

示兒延敬

許宗彥

蚊口之利嚼膚血翼單腹壯遭指蔑鸚口之巧善語言翅短箴密囚煩寃物猶如是況于人禦人以口良不馴

一時快意逞捷給弱者含愠強者瞋招尤召敗豈他罪
罪口之由弗可悔誦言如醉何其愚聽言則對亦曰殆
小時或以辯慧誇長者憐汝不疵瑕大來誰肯更恕汝
惡聲還復於汝加孔子恂恂百世師嗇夫喋喋無所施
舉策數馬保厥位期期艾艾名聲垂戒汝不早我之恥
汝不我聽亦已矣汝口訥然我心喜

張琳
陳裴之勵志詩見讀書門

百忍吟

朱錦琮

平生功在忍忍性乃忍情動忍增厥能隱忍就厥名忍
之又忍處寵辱皆不驚愁城獨困汝不妨忍而興樂事

國朝詩金 卷二十一
能娛我奚難忍而捨所以行路難依然安樂窩亮哉古
人語百忍成太和。

趁早歌五首

陳其德

讀書須趁早讀書不趁早後來徒悔懊精力本易衰光
陰如電掃見人享榮華自己惟嗟老

孝順須趁早孝順不趁早高堂容易老甘旨盡吾歡菽
水承顏好一旦恨終天珍羞總虛渺

積善須趁早積善不趁早趨向已差了念念貴操持時
時宜探討方便在寸心陰德只嫌少

作家須趁早作家不趁早終身怎能了俯仰俱吾事衣

食原非小平生無料理垂白徒苦惱

教子須趁早教子不趁早大來多顛倒
砥礪真可憐佑啟非草草蒙養是聖功
琢磨全在小

閒居雜詩

蕭掄

自來聰明人中必多嗜慾要在以理閑久乃與道熟不
爾爲文章徒以悅時目不爾談經史徒以駭流俗出卽
捷徑營處卽財貨黷沈酣聲色中汨沒榮枯局物論卽
相寬內省甯不惡閒居課道心歌此以自勗

閒居一室中從遊四五人天姿多樸茂學治科舉文呼
之使來前爾業宜精勤朝右方需才志士思立勲昔

工制義者亦多有名臣苟不先習此何由得進身語畢
喑然坐竊自哀妄言古人所學道措之卽經綸兵農與
禮樂一一有本源降及諸子家申韓術始分其說雖近
駁其用亦獲伸詎如今帖括游談而不根優孟聖賢語
經濟非所聞人材坐敗壞先生復何云何當與諸子經
史相指陳

袁安雪中臥不肯出千人梁鴻滅竈炊不屑餘熱因志
士甘固窮素履安其貞云何韓退之戚戚而憂貧遺書
于襄陽乞彼一餐恩無怪後世士相率趨侯門紛紛事
竿牘汲汲相攀援遊子日益賤長官日益尊崖岸一不

持。甚至等雜賓。賤子久閒居。老畏涉關津。寄聲鄒枚輩。
莫戀梁園春。

我慕班定遠。個儻多奇節。投筆一長歎。自惜封侯骨。男
兒七尺軀。肝膽一寸熱。低頭作博士。毋乃非人傑。方今
楚蜀間。盜賊猶未滅。登高望東南。雄心時激發。諸將擁
重兵。裹糧糜歲月。不聞求奇士。良平得在列。白面好談
兵。慶之將面折。磨盾作露布。此志空騷屑。但望烽煙消。
四海息戰伐。江南財賦地。婦子安耕塋。閒居詠太平。擊
壤自怡悅。

閒居數十載。遷變難具陳。坐見垂髫子。已作時

堂或荆杞白屋爲朱門更憐風俗異耳目竟一新樸者
皆繁縟質者亦趨文昔時珍奇器今乃市肆陳昔時縉
紳服今被輿臺身謂是民侈富不知實窶貧邑中素封
家十不一二存君看婁江水深淺非舊痕萬事盡如此
感歎勿復云

去者旣云遠來者未可知其間有一我自待安可卑古
人未竟業儼若與我期今日不努力將爲後人嗤人事
有消長此理無盈虧聖人不凝滯與世相推移浩浩隨
濁流悠悠鋪糟醕嗟予何所慕狂士其庶幾彈琴咏先
王懷彼軒與羲閒居閉蓬戶正予嚶嚶時

四箴

陸以活

言箴

言之甘歟。徒累已德。言之直歟。或遭憎嫉。將擇人以抒誠。又患無知人之明哲。人緘口吾獨否。負氣自矜。逞才爲能。曷由守樸以保身。

行箴

百行之善。令聞未遽宣。一行之惡。已蒙厥愆。愆善惡之幾。辨之宜審。稍縱卽誤。敢不凜凜。勿謂善蒙垢。可弛勤修。勿謂惡無損。致招悔尤。已往難追。後來當勉。早夜以思。孜孜實踐。

勵學箴

人無賢愚非學曷成理無精粗惟學乃明譬彼嘉樹木
固斯發又如泉流源遠不竭研嗜宜篤造就乃深古聖
敬修尙惜寸陰矧余小子敢逸豫以放心噫嘻歲月易
逝其肯爲余待耶今茲不力得勿貽後之悔耶

慎交箴

哲人求友必尙乎德以義以信是當取則衆人得朋恆
徇乎私相優相狎慎勿效之親賢遠佞爲功匪易在持
厥守兼擴其智昔者君子擇交至精結納勿濫切磋有
成今予小子奈何不慎觀人無識應物失止悅不若已

咎將日增。庶用告誠。尙其敬承。

雜詩

吳世涵

晉人尙任達。厥風竹林始。任達特美名。其實乃放侈。伶籍雖有託。防閑固已毀。畢盜乃臥甕。謝淫竟折齒。紛紛登輔輩。穢行喪廉恥。何物老嫗兒。捉塵尙自喜。滔滔江河下。胥溺遂不止。誠哉右軍論。虛談恐廢事。偉哉樂令言。名教有樂地。

漢代重名節。士行咸修持。好名或已甚。矯僞時有之。郭巨惜分甘。忍於埋其兒。伯道因攜姪。已子繫樹枝。茅容矜孝養。對客乃宰雞。李充以私語。稱觴去其妻。人情不

相遠情協理自宜拂情以沽名。名得實則虧。諸君誠卓
卓。捫心得毋欺。聖哲有庸德何必矯異爲。

示兒

閩媛汪嫫

讀書能養氣。乃爲善讀書。矜躁不平釋。高位終難居。近
道莫如靜。靜坐神安舒。何事營塵緣。逐逐追鋒車。處世
心和平。自反樂有餘。敬齋兩箴銘。朱張旨弗殊。一念常
惺惺。畢生無憂虞。

至聖天縱姿。神明恆得主。七十始從心。仍是不踰矩。少
年氣無前。臨幾輒莽鹵。一蹶不復振。餘勇安足賈。伏波
誠姪書。豪俠慮畫虎。奇才若武侯。謹慎善自處。以約失

者鮮終身事斯語

父母愛子心何事不慮及寤寐心皇皇般憂莫如疾念
兒仔肩重保身爲最亟寒暄須順時兒偏畏夏日心靜
自生涼炎歊氣都息喜寒頻飲冷毋乃心偏執岐黃重
溫養陰平陽秘密

見大則心泰天機自然暢菜根不肯齧本心日益放痛
兒失怙早孤露增懷愴茶藥毋備嘗今朝得祿養一勺
皆君羹知足無過望循分守節儉出入兒宜量所貴
取人廉用之得其當

行路難

莊 燾

君不見人生行路難。不在千里萬里遠。行役出門入門。多險艱。一步一躓。生荆棘。太行未云險。孟門未云仄。誰知庭戶間。網羅日相迫。食梅自知酸。含蘖自知苦。左有猘。猱右豺。虎前張勁弓。後強弩。欲行不行愁。奈何山鬼。擲揄陰風怒。仰羨孤鴻海。止來隨風冥。冥誰敢侮。

果報

封令化虎行

容縣舉人封維翰曾爲江西邑令後還梧州變虎食人宛涇王吉仲作詩

紀異余因作此

王環

昔時封使君。化虎食郡民。今日封明府。入山化爲虎。哀哉守令皆。姓封胡。爲一旦成大蟲。多是一念貪暴之所。

致遂生牙爪爲山公曾聞宏農之虎渡河去詎知人牧
乃化茲形容爾食人時迷爾性山林城郭餘腥風吁嗟
乎今人從政者誰非猛虎坐堂中

張景崧弄潮兒歌見富貴貧賤門

貴游行

黃景仁

貴游誰家子驄馬驕馳騁朝入銅龍樓暮歸紫薇省盛
滿不自持惡風吹夢醒照鏡鏡無頭披衣衣絕領可憐
西市中鬻容尙修整白首誰同歸蕭蕭看日影生存骨
髓枯濺血不盈頸當伊作吏時千軍告其猛眼見被收
日曳曳勞尺綆觀者徒咨嗟誰與發深警

郭孝廉行

蕭山人名秋水

周三燮

丙子浙闈秋榜發第八十四郭孝廉文辭不自譽孝廉
何乃謙孝廉品誼優與文章兼今年元日日其鄉先兆
夢蕭山中六人郭家必有中孝廉陰德天所重孝廉自
知家不知蕭山鄉人知者衆孝廉昔行路小憩涼亭陰
一人並坐不顧去豈知遺卻囊中金孝廉曠野獨沈吟
失者固自取得者匪克任自午至申坐待久其人行二
十里方追尋求之不得如聾啞孝廉詢得實還予毫不
侵初念與轉念危哉微哉此一心孝廉昨投徒村塾臨
水口一人業操舟病愈益債負下無子兮上有母力竭

計窮將鬻婦孝廉聞之滿村走爲採若事誠與否所需
雖祇二萬錢無奈空空惟素手亟呼徒來前歛錢一旦
有欣然畀其人幸哉不失耦其人償逋更善守兒今襁
褓婦并白不然無室無家且無後噫吁嘻還金何其義
贖婦何其仁此本吾儒分內事難在孝廉家苦貧孝廉
孝廉無憂貧上天豈負仁義人丙科浙榜得君重蕭山
鄉人知其真我今問孝廉覆述言恂恂我願孝廉他日
爲名臣如鳥有鳳獸有麟一挽末俗皆還淳區區科第
未足榮君身

李將軍行

王嘉福

嗚呼李將軍將軍少日氣不羣豪富烜赫動縉紳珠履
百諾爭趨塵朝餐食品羅山珍華燈達旦伎樂陳繡帷
夢醒紅日昏錦衣襴褸去踏春連錢走馬飛如雲擣捕
一擲千百緡承顏猶干怒日暝兄不爲兄親不親驕橫
里黨鋒疇攫窮檐矻矻啗書生不知何物爲功名坐擁
百萬勒田彭謂當愉樂終其身嗚呼李將軍誰知天道
懲頑民祝融一炬冰山傾鸞妻買宅成賤貧錦衣破碎
如結鶉曩時譽者今反脣蒙頭跣足朝汲河之濱道旁
一老哀王孫哀王孫昔年奔走堂前人竭來駟馬稱高
門嗚呼李將軍

讀書

經史法戒詩

錄九首

張鵬翀

春秋見至隱履霜防忽微人主不早慮因之致顛危前
有讒不見後有賊不知晉獻惑嬖妾優施教驪姬分明
置堇蕩乃謂愛我爲卒至爾敢傷智謀亦何施覆轍示
深鑑足爲後事師

此戒信讒人
重內寵也

天王柄下移征伐強侯出伯業亦浸衰陪臣勢無匹強
私家弱公室三桓六卿互分析豈無衣六與七不如子
衣安且吉壞法亂紀自王朝史書特繼春秋筆

此戒政柄
下移也

漢文恭儉最稱賢身衣浣濯爲民先年年禱祀祈民福

鄭重農功珍五穀但令閭閻常富足。國家何用儲金玉。

此法恭

儉也

神仙有無何恍惚黃帝廣成但傳說秦皇漢武慕長生
方士怪迂始百出安期盧敖去不來文成五利徒喧逐
神君未下鬼先集世上烏有神仙哉蓬萊可望不可卽
但願人人足衣食昇平樂過華胥國

此戒求仙也

近小人遠君子桓靈之衰只緣此跋扈尤嗟任宦官一
時鈎黨盡摧殘俊厨顧及空標榜白馬清流釀禍端士
氣衰國運否人才與國相終始千古興亡鑒青史

此戒親佞

遠賢鋤正人
參邦國也

治安共說梁天監南北通和救塗炭金甌無缺侈心生
白馬青絲輕納叛薄心腸激成變果致紛紜滋反間捨
身同泰會無遮血食牲牲改爲麪貪嗔至竟未能除荷
荷空悲淨居殿

此戒紊政
逃禪也

閱武堂前種楊柳至尊屠肉潘妃酒祇愛蓮花步步生
曾知國步艱難否百年南北擅風流誰信無愁果有愁
纔見荒宮餘辱井又看芳苑起迷樓阿麼詎惜好頭顱
瓊花只戀須臾景解道眞仙也自迷不知狂魄何年醒
此戒色
荒也

臨淄英武摧羣凶美政開元繼太宗臺閣名臣刺州郡

人情和洽多年豐歷年既多心漸侈國事無端寄楊李
長安一騎荔枝紅萬姓那知作瘡痍漁陽鼙鼓太無情
入蜀青驪辛苦行誰將夜雨淋鈴曲更作朝元奏樂聲
此戒耄荒任姦
邪寵女調也

宋家累葉垂遺澤求治賢君方側席天津橋上聽啼鶯
禍亂將興任安石相公新法執持堅祖制詎難胥變易
忠良屏黜奸邪升朝局如碁互廢興千古知人誠不易
那論福建誤金陵此戒變祖法
用言利臣也

吳中
吟 兔園冊

錢維喬

南人得英華北學窮枝葉古語雖云然近者益浮雜東

髮授句讀訓詁但掇拾小學猶面牆者死空喋喋百金
市輕裘千金買美妾獨至延經師計較及絲粒簡編本
糟粕况復鮮卒業縱復爲達官吾恐書伏蠹

堂堂吟

爲友人
釋愁作

程晉芳

堂堂復堂堂青春未老白日長
雜花含煙乳燕舞游絲
落絮爭飛颺長安少年豪且強
鞞牽犬趨長楊短衣
初試鸚鵡舞細笛更進邯鄲倡
腐儒躑躅行道旁履穿
裘敝神揚揚歸來破壁懸空囊
兒啼婦怨厨無糧鄰翁
相勸語激昂讀書何益治生良
翁言慎矣何足臧獨不
見買臣五十歸故鄉腰下金印懸煌煌
相如沽酒典鵝

鷓鴣一朝詞賦獻未央。瑱璠韞石豈患剖。琅玕入握終生
光。仰天一笑看屋梁。丈夫未死誰能量。吁嗟乎。丈夫未
死誰能量。

舟中讀書

又

家居苦塵紛。客邸困酬酢。迢迢水國程。差遂讀書樂。生
無百歲期。寒暑迭相薄。顯晦隨其時。詎忍自隕穫。古人
如蒼龜。簡牘恣搜索。獲我明夷心。所契在瀟泊。安能手
一編。空谷長棲託。

文選雖浮華。修辭得窅奧。西漢杜陵翁。勗子用垂教。如
何近代人。屏棄勿復好。淺冊窺兔園。巴吟等蟬噪。吾觀

上達者下學每精到所貴擯其英而勿襲其貌誰歟賞
此言流水方浩浩

讀書四首

法式善

讀書如蓄貨一室靡不有瑰奇產巖阿幽怪發淵藪當
其求莫致豈惜跋涉走一旦聚眼前美者忽焉醜人情
罕見珍炫異難持久布帛與錦繡卽物理可剖六經天
地心諸史古今紐但期鑄洪爐毋至覆醬瓿

讀書如樹木不可求驟長植諸空山中日來而月往露
葉旣暢茂煙條漸蒼莽此理木不知木乃遂其養我讀
古人書輒作古人想掩卷了無得心中時怏怏忽然古

明月照見天懷朗。前境所造非後境。改觀儻

讀書如行路。歷險毋惶惑。安保萬里程。中間無歇仄。自古志士心。往往傷壅塞。誘我復攻我。歧路况莫測。所貴擅通才。半途勿休息。手扶大雅輪。心戒虛車飾。要從實地行。直造光明域。卓哉孔孟有不爲。黃老得

讀書如將兵。當先講紀律。將軍掃羣寇。勢若風雨疾。寸鐵能殺人。彼百我則一。卽云將軍才有得。豈無失不聞。易所云師貞丈人吉。古人書弗多讀之。容易畢。後來著作家。千言萬言出樹義。不制勝不如不開帙。

憶母勸學詩

謝道承

兒來前自堯至今凡幾年兒強記自堯經今凡幾帝兒
時應對稍逡巡母顏變色旋怒嗔陳篋遜志學人責稽
古胡不如婦人吁嗟乎母言在耳兒顏猶泚安得我母
常嗔兒常泚於今勸學無聞矣

讀書

尤興詩

古人重學問勤讀聖賢書云得著腳地如木有根株惜
哉伴蠹魚流弊失之愚讀書不讀律獄訟繁秋荼倉卒
艱大投安用此腐儒讀書泥師古拘爲迂闊圖紛更策
富強騷動困追逼設天下蒼生謂非此人歟讀書昧治
生不辨黍與稌撐腸五千卷無以療飢臍間有猥介士

蹈矩不破觚庸流壞舊坊久之失故吾翻爲讀書病厥
病非區區故必通三才。致用秉一樞經訓爲菑畚道德
爲醞醕禮義爲干櫓乃與古人符君子貴不器子云良
不評

詹應甲示高安諸生詩

張履學箴並見訓士門

勵志詩

錄六首

張琳

大道自坦夷奚必由捷徑君子安固窮踐履守其正詭
遇或逢時未敢違吾性嗟彼行險徒勞勞豈知命
天序無停輪烏兔東西走人卽壽百年百年亦匪久求
仙思長生金丹果何有立德崇令名千載長不朽

一鑑本空明昏乃塵堞翳一水本澄清濁乃泥滓累萬
理會寸心勿受外物蔽明性養虛靈毋失作聖膚
文辭本枝葉義法爲根柢云胡逞才華鬪靡爭似詭藻
績掩眞意馳騁乖名理修辭尙體要庶免虛車詆
士人伏草茅感慨嗟不遇爲問草茅中挾持果何具聖
賢樂天命窮達行吾素求志在隱居富貴原不與
洪由纖可積遠卽近爲推丈夫志四海一室宜先治內
行苟不修焉能大有爲所以古賢哲行己慎其微

讀書有所見作

十六首
錄九

蕭掄

人心如良苗得養乃滋長苗以水泉溉心以理義養一

日不讀書胸臆無佳想一月不讀書耳目失精爽人生
近中年塵事日浸廣姑就務少閒攜書坐幽幌思枯藉
潤澤理浹愜心賞君有徑寸苗慎勿置槁壤

義理如山川古今日開闢堯舜所未言孔孟推其極後
人治六經亦貴有特識漢唐宋諸儒立說誠詳核未必
無贖義留與更梳櫛開口卽陳言盜竊竟何益

三蒼漢代書尉律學童試昌黎亦有言爲文宜識字不
讀爾雅篇訓詁違經義不觀許氏書俗字供驅使正可
書吏牘詎宜登載記須知古小學六書居一事更有商
高術業亦宜時肄

讀書言攷據詞章稱著作兩家更相笑居然如蜀洛注
疏幾部書文選一家學彼固譏綺靡此亦陋穿鑿要是
不相強心思各寄託水流須爲川山挺須爲嶽但自成
高深何用相非薄

稽古務精詳不專誇強記劉向在漢時博雅無與二及
觀所著書中乃多可議古書惟五經左氏史官記說苑
所纂述事多與互異豈其采錄多醇駁遂雜廁我思昌
黎言古書識眞僞是非明辨功曷由臻純粹

後世無班馬未嘗廢文辭後世無屈宋亦復有歌詩文
章隨世運各自鳴一時古今雖云殊義理無盈虧譬如

大海水一任斟酌之苟能中有得奚問源流爲屑屑摹
古人乃徒得糟糲

東坡言往事鈔寫書難得後來板本興羅致易爲力難
故爲枕秘研摩廢寢食易則富收藏縹緗委一室此風
今更甚古書多摹刻得者覽篇題便如業已卒汗牛充
棟藏於我竟何益

先儒教子弟勿令觀世說西京雜記文蘭成務區別讀
書必審慎是一稽古訣後人多多聞稗官供采擷反於
經史文一一多鶻突願言屏雜書矩矱遵前哲

古人著述難後人著述易難故用思精易故多蕪累相

如大才人七篇盡能事思王及康樂文亦數可記降及
宋楊陸卷帙動盈笥究竟比古人胡能及一二君欲探
驪珠盍將鱗爪棄

勵志詩效張茂先

錄二首

陳裴之

勵志不在奇立心貴忠孝勿欺天可格毋違聖所教屋
漏矢旦明寢門侍色笑忠勿誤激烈孝勿飾文貌體驗
在平日篤實先履蹈骨月驗性情無惡亦無好友朋驗
交際無諂亦無傲動植養和平日月爭光耀

讀書貴經術用世貴經濟經濟數大端持要畧苛細農
桑與禮樂行之有次第治國先齊家不在權與勢王道

本人情不在才與智。匹夫修於鄉閭。閭敦孝弟。良士登於朝。海宇享樂利。所冀仁里仁。仁更師義莊義。

讀書二首

張維屏

讀書何所求。將以通事理。奈何教兒童。誘以博青紫。少年慕富貴。努力鑽故紙。想其估畢時。意已不在此。聖賢千萬言。割裂等統綺。一朝得志去。譬若假道爾。遠大難預期。初念要勿鄙。造士先養蒙。請自小學始。

六經闢大義。赤日行天中。諸子如眾星。經緯各有宮。羅列廿二史。治亂爲一叢。後人矜獨得。前人所旁通。後人苦艱難。前人所從容。故紙愁汗牛。新機競雕蟲。文章不

適用。黎棗災何窮。一火灰百家。君勿尤祖龍。

讀書五首

王文瑋

有明逮中葉。士尤尊其師。醉佛老糟粕。相率談良知。繼
開東林社。天下爭奔馳。趨炎倖標榜。伐異淆公私。官常
既毀敗。民俗由澆漓。一代重科第。厥效竟如斯。

洎乎改玉後。巖穴遺老成。讀經兼讀史。務實不務名。制

科召鴻博。古籍彌專精。開先閣。百韻亭輩置論。猶持平。

惠定東戴原東俱晚出。漢宋崎重輕。說文資訓詁。一字斷斷。

爭謗傷朱仲晦。勦襲毛初晴。西河

於文貴駢儷。集腋成狐裘。王楊盧駱體。不廢江河流。秀

句齊梁摘元音漢魏求袁隨園吳穀人實巨擘要自橫千秋

古文作者少江左推方望溪劉海峯寥寥短篇耳頗亦邊幅

修起衰七百年此語吾信不

論詩輕七子爲其摹盛唐南施伴北宋無礙舊冠裳袁
蔣轉風氣新聲遂洋洋俳優豈元白堆塚非蘇黃近日
崇臺閣燦然雲錦張唐賢三昧在終愛新城王擾擾萬
蚍蜉撼樹庸何傷

在宋溯學術本自分兩途君子亦有黨角立程與蘇頗
覺程可厭而惟蘇是趨延師課子弟則又不厭迂求友
宜坡谷教子宜程朱文章乃枝葉道德其根株芬華今

已謝努力爲眞儒

擬新
樂府
讀書堂

彭兆蓀

曉升讀書堂時藝滿屋角諸生口嘈嘈師長面嶽嶽經
史子集束高閣別有眞傳博人爵曷不飛去生處樂胡
爲東塗西抹高著眼七畧九流自纏縛舉秀才不知書
察孝廉父別居西京取士已如是何况區區較文字。

齋中讀書作

彭蘊章

少小讀論語兼誦朱子註剖析在微茫心知善惡路壯
而失其守皆爲嗜欲誤理豈反不明明而自欺故須下
堅定力庶不窳吾步

賢愚皆好奇古書率多僞三墳既可造九邱何難志嗟
彼崑崙山何人至其地徒侈域外觀空談皇古事讀者
亂聰明作者矜才智我欲驅羽陵萬蠹食其字

雜詩

吳世涵

國風久不作騷賦出靈均寄辭寫忠愛擊涕思美人朱
玉漸靡曼綺語賦朝雲逶迤逮魏晉淫思日以新梁陳
弊已極狎客皆詞臣宮體旣已盛六義委荆榛後此香
奩詠鄙褻靡不陳摛詞固有則選言在雅馴諷諭苟無
取導淫徒紛紛先民有矩矱大雅誰扶輪

題課讀圖

爲沈質
坡題

王壽康

生兒無多求。但願書能讀。縱使聞達難。恰已醫庸俗。羨君有佳兒。嶄然露頭角。意豈期望奢。惟受讀書福。桐陰繞屋涼。展卷日相督。不必奇字搜。不必異書蓄。能爲好秀才。心已萬事足。祝兒莫聰明。坡公意原曲。不然叔黨名。何乃繼玉局。

某鬻匠

曹德馨

兒時入村塾。先生爲某氏。架上書縱橫。鬻匠借不已。鬻匠借書何所事。答言畧看人樣子。人樣子已看廿四史。烏虜鬻匠何所事。及我有知欲訪之。鬻匠已返黃山死。

鄒志路建陽書燈田詩見善政門

交際

結交行

夏之敘

結交莫學三春桃因風吐豔隨風飄結交莫學十七月
昨日團欒今日缺人生一世多風波青蠅白壁常如何
君看羊左并衣共生死千古交情常不磨

貧交行

顏 統

君不見張耳陳餘貧賤時結交刎頸稱心知本期共逐
秦家鹿富貴相爭不自持一從絳灌列茅土一死泝水
爲亡虜遂令天下論交情朝爲秦晉暮吳楚漫稱角哀
與伯桃西華零落感孝標從知悠悠勢利者一生不及

古貧交貧交不在多黃金黃金不多交亦深意氣還將
然諾重得失榮枯何足論貧交結契水與山生死相從
無留難愧煞當時車馬客轉眼忘情反覆間

君子行

張寶居

小人不可交交亦勿輕絕交之禍機伏絕之禍焰烈譬
彼贅疣身爲患非不切一朝剖刮去性命多夭折不見
幽谷蘭荆棘生其旁豈不欲鋤之鋤之蘭根傷鴟梟亦
云惡鳳皇任翱翔魚鼈非不賤蛟龍與之忘所以古達
人廣道以自全世路何紛紛浮雲過青天

貧交行

許自俊

囊中有錢壺有酒如雲如虹十八九可憐變態頃刻間
一朝金盡無朋友平生零落兩三人同少同壯同白首
一篇向我多古歡百歲與君忘老醜相知每在飢寒中
家無儋石分升斗愁苦深於妻子心痛快切於左右手
憶昔投簪安樂時把臂論文若某某兩朝相隔數年來
交情猶似當年否

君子行

陳學洙

君子畏幽獨大廷乃敢言小人讐稠衆衾影不可捫繩
尺君子心之死靡所奪脂韋小人態臨難思苟活譬如
丹山鳳煌煌世之儀地蝸藏陰房白日難逞威又如青

松枝經霜不渝色厭彼荆棘繁翦伐何足恤緇素既異
梁砥瑜似同形瀉水一器中當辨涓與涇

息交

顧圖河

君子如春風可愛不可竭小人如酒顏但得暫時熱急
絃莫浪彈一彈絃一絕市交莫浪交中路難固結惟當
同心人可與論金鐵

結交行

陳至言

世情多結交結交非知心黃金與白璧不多交不深古
人重然諾重之如邱嶽今人棄之若泥沙一貴一賤恆
相誇古人貴俠腸貴之如琳瑯今人視之若糞土一死

一生不相顧不見昔時雷與陳堅如膠漆情最真又不見當年羊與左併糧臥雪無爾我近時相知何其多對面反覆真嗟哦日日酣歌金叵羅金叵羅如斧柯結交結交將奈何

結交行

劉廷璣

古人結交重意氣今人結交尚杯酒白犬丹雞到處盟上至貂蟬下屠狗香煙未斷口未乾心生冰炭雲翻手羊左遺風邈莫攀管鮑高情亦烏有嗟此悠悠假弟兄五倫忘卻眞朋友

結交篇

劉大櫟

結交結俠烈佩劍佩昆吾投身喧競地反覆在須臾昔
我有好友貧賤共相於夜讀共膏火晨牽共轡廬同眠
共茵席同食共盤盂一朝舍我去振翼上天衢高鶩九
霄步視我如泥塗門前足三及未得履階除歸來懷憤
報頓足發長吁語君且勿吁何不愼厥初丈夫警良驥
安得侶駑駒閭巷有義士緩急可時須我聞不卜日冠
帶詣其廬長跼執恭敬相邀入酒壚酒酣氣慷慨相視
色數腴煙霞一相契金石不能渝不惜微軀殞遑論傾
有無牽衣向赤水攜手到清都請謝我良友貴賤本懸
殊擔簦與跨馬相遇各分途

結客行

黃子雲

結客須結貧。貧者或有肝膽真。結交莫交富。富者全無意氣親。古來世態已如此。今更異乎古所云。

鄭虎文睢陽吟見驕倨門

吳中
吟覆手雨

錢維喬

男兒重結納。豈惟杯酒間。一朝共雞壇。死當豁心肝。自從管鮑沒。聚合如沙搏。執手作絮語。中有千仞山。殷勤爲策謀。貌熱心已寒。朱門易分潤。奔走承其顏。白屋有乞求。卻之及盤餐。甯但緩急難排擠。至無端不如閉蓬門。獨處羞自安。

客懷雜感錄五

張雲璈

錢唐一老尉初忤王相色知是同年生轉爲薦京職建業有進士負作上都遊一千韓魏公遂得百千調古人於貧交未肯輕棄置非關市私恩祇自傷同類今人棄如土往往秦越視有所挾而求終非其本志欲學何元靜齋名無不至不如禰正平未嘗投一刺

梁朝有任昉平生廣交遊往來座上客翩翩皆名流號之爲任君尊與北海儔一旦身歿後諸子業不修孤寒難自振誰爲朝夕謀冬月尙葛練常懷北門憂當年舊交人相對眼如秋道逢劉孝標泫然凝兩眸作論廣絕

交疾之如仇讐。五交與二覺。足爲名士羞。遂令到漑輩。
慚恨以几投我讀。南史畢振觸胸中。愁朝出遇貴人氣。
能如五侯暮出遇貴人。車前鳴入騶。豈無任公子。困苦
不見收。

偶有誣諉事。切切向我友。我友貌慨慷。遇事輒肯首。遲
久竟杳然。所望意殊否。初謂暫遺忘。未必終負負。及其
了不應。十事常八九。昨遇廣座人。道彼要平。可久頗怪
此譽虛。疑蓄不能剖。細視乃悅然。所稱固某某。是皆居
要津。有命豈不受。人微而言輕。宜向吾輩。丑且莫責彼。
諾先欲緘我口。

城東一少年與我沾葭葦偶然得其志氣與儕輩殊自誇凌雲翮一縱翔天衢雖然矜人地不知藉膏腴隔我入九坊終歲不造廬趣向日以異顏色日以疎親故尙如此旁人那可問此時尙如此他日那可近。

平居鮮嗜好乃至無一技飲酒審琦同圍碁葛洪比擣菹與蹴鞠事事不如彼鬪雞及走狗尤素所不喜哄堂撒胡菱復不利牙齒不能弄絃索不能調弓矢自問無一可定爲人所訾近時尙徵逐惟此爲足恃以之相結交以之供指使視我如怪物謂世那有此我甘坐向隅焉足爲大恥此而不若人警之無名指。

感交行

戴良

古人重氣誼今人重杯酒平生漆與膠此外復何有不
知車笠詞但作牛馬走歡極敢猜疑厲然責我負是非
金石堅那同松柏久其始既蠅營其終必狗苟

結交行

王嘉福

看花當看春結交莫交貧春花色恆耀貧交氣不伸昔
我同袍友慷慨皆絕倫旦夕相宴會出入馳疾輪堅心
盟白石高誼凌青雲酒酣誓肝膽感激輕此身一朝處
貧賤轉眼無與親昔爲座上客今作車前人入世各自
謀失意復誰陳三復中散書泣下霑衣巾

讀書所見

汪大經

膠漆兩相憎冰炭兩相愛淮南非浪言中有至理在陸
抗與羊祜敵國餽問再楊李官同朝攻訐成大懟相愛
者君子相憎小人輩

論交

錄十
六首

梁紹壬

人生鮮兄弟取友道宜亟百業皆可友所惡無常職匪
不壤與箠匪不鍼與石信義皆虛懸安能免反側
周魯指困情管鮑分金德豈爲些須賤貴此風塵識世
人惟好名古道不可卽區區推解事意氣殊自得彼亦
平原賓此亦孟嘗客揮手千黃金嗚呼賤如石

故衣不如新，新人不如故。衣故外不堅，人故中益固。結
客少年場，被服皆紈素。一朝判雲泥，揮鞭掉勿顧。昔爲
錦上花，今爲草頭露。身入世情中，莫爲世情誤。

廣廈庇寒士，多裘蓋洛陽。儒者過分語，未免徒矜張。丈
夫重意氣，口惠非所望。一飯有眞意，勝贈千金裝。紛紛
好名者，相與爲鋪揚。苟非胞與懷，毋乃狂言狂。

華歆鋤下金，旣拾旋復墮。似亦遷善者，何遽割席坐。豈
料龍頭士，竟啟許昌禍。乃知拾金時，其念亦已左。君子
貴識微，慎交求在我。

人生秉五行，所性各分界。辨交須辨性，不爾便褊穢。彼

或好慷慨此或守狷介在在欲求全交道由斯壞不聞
宣尼聖遇雨不假蓋

結交貴從善莫若先絕惡金可以受礪石可以爲錯塗
炭必嚴防衆匪何所託甯爲鳳隊雅勿作雞羣鶴

結交貴肝膽或則尙道義次亦文字緣下乃貨財誼論
交須辨交勿自亂其例易地以相處隨在易滋戾獲戾
始歎嗟何如慎于未匪誇稱物權中有全交意

遇事剖俠腸成事矜德色夫豈不感恩中心自惻惻謂
以世故交無復真意淡真意在何處相期以金石金有
時而鎔石有時而泐懷中一寸心千載永不易

貧士好趨炎其見固可鄙然使過傲物是亦其習氣不
見趙信陵身自出華裔衣冠簪笏中夫豈盡勢利杜陵
依嚴武入幕結深契義山客茂元且爲掌書記不聞後
世人卻將兩公議

身居袍笏場結交豈能擇胸中有陽秋所貴持特識汾
陽見廬杞左右屏侍妾徐勉謝求官終夕談風月高懷
與雅度已足混瑕隙何必阮步兵雙眼分青白

范張雞黍約隔歲預相訂匪以小節拘卽此見大信何
期末世交成言多悔吝紛紛剖約劑一笑何足證

今夕是何夕華堂張明燈敞筵肴核具列坐簫管聲酒

酣客意樂願執牛耳盟紅箋色如蒨墨筆書縱橫酒闌
高會散門前車馬盈明朝市上遇相與問姓名今日爲
陌路昨日爲友生檢點袖中刺紙薄如人情

沸湯一失火俄頃若冰冷羣卉一別夏逾時成衰梗座
中有熱客勿與爲刎頸蓋其初見時交情亦已盡事理
有固然動極則歸靜君子淡如水此言發深省

飲酒須飲醇結交須結真真自在道德非以血氣論血
氣一用事道德俱無根荆軻空負德聶政能酬恩成敗
雖各異均非吾所聞

久交無狎語絕交無惡言匪僅全忠厚亦以遠禍愆暱

眦有必報此意宜防閑詩人諷刺意委曲而纏綿

結交行

張振凡

男兒結交重意氣長者呼兄幼者弟拔劍起舞肝膽傾
相約不敢中道棄酒樓豪飲斗十千人生富貴如雲煙
縱談千古薄朱郭傑然氣誼高青天一朝薤露無餘積
弱女孤兒竄荆棘叩門輾轉欲何依報道平生不相識

寄夫子

閩媛汪 嫫

古人不可作古道長悠悠薄俗天性漓勢利矜交游縞
紵篤意氣異域情相投一朝處患難落落無朋儔朱陳
忽秦越袖手誰與謀古來管鮑交緩急能分憂久要言

不忘如新到白頭因不失其親聖言良有由

施予

紀蔡道上事

金姓

大裘如陽春展覆杭州人斯言何必實厚澤留潮濤何
來蔡道士肯念杭人冷小試白公言縣襦三千領裝船
若柳塞打冰到杭州關吏駭且疑環視詰所由賢哉權
關使滿百割其二一領酬一金留之供代施計值良已
浮道士辭不獲還吳更補置溢數乃七百道士既施惠
使君亦分功遂令無衣子不復愁剛風我喜得聞之低
頭拜道士黃冠能倡募吾輩應愧死使爾任民牧甯復

歌無襦道士遽掩耳儂豈名韉拘我特有一言誰爲致
權使飭吏守寬平衣被彌深矣

鬻裘行

宋茗香助教以衣施寒者後不能繼乃鬻裘余高其義作此詩也

湯禮祥

朝解衣暮解衣三朝三暮復何有但見眼前颯颯西風
吹西風吹骨欲折葛帔練裙踏冰雪翁將何計回陽春
鬻裘不顧妻孥嗔黃綿大布任攜取直視衆身同一身
我對鬻裘翁重憶披裘客千金買裘都不惜卻贈歌童
五陵陌道旁冷眼空歎呼白公大裘今已無嗚呼白公
大裘今豈無願君此心終不渝

石門馬氏蠲粟賑飢紀事

石門馬氏南國棠道光甲申春蠲粟一萬七百

餘石賑邑人乏食者正月至三月活七萬餘人中丞師公上其事於朝賜四品銜金山姚

蘇卿紀

以詩

姚清華

太歲在癸未一雨逮三月時當夏秋交田禾盡淹滅漂
溺跨數郡徧地泥滑滑嘉湖爲尤甚水深沒過膝斗米
五百錢炊煙漸漸歇卒歲已大難入春定不活可憐十
萬戶駢死波濤窟馬君英雄姿許身比稷契大啟新倉
儲一罄舊廩積發粟一萬石賑飢六十日蒼生氣稍蘇
戶戶感肉骨君心猶欲然恨不徧兩浙人皆謂君愚倉
廩甘罄竭我獨服君勇志氣異凡質下不顧子孫中不

國朝詩金 卷二十一
謀家室誓棄萬鍾粟建此不刊烈長官爭嘉賞 九重
頒顯秩嗟彼齷齪兒眼孔細於蟻喻利罔喻義錐刀競
逐末鐘鳴漏盡時猶計較屑屑自謂億萬禩永保可弗
失枯骨尙未朽生計已漸絀田園俄轉移庭戶頓闐寂
誰無向善心盛衰易改轍視君天壤殊不可相較絜當
其舉念初赴義如箭疾人命苟可延余哺不妨輟但得
閭里存敢惜甘旨缺至於沒世稱轉若輕毫髮君名曰
國棠伏波其先哲結茅走馬岡高阜撐突兀他年數義
行一指首先屈

楊鑄屯米歎見吝嗇門

夏之盛貧米歎見米穀門

湯國泰入勸歌賣穀賈篇見災荒門

崇儉

陸劄低低屋吟
吳昇薄薄謠

並見止足門

贅言

袁樹

貧乃士之常儉乃德所美沐猴而衣冠麒麟植尤恥適
體自文章充腸卽甘旨少年不解事刻意驚華妍服飾
異常度風致誇翩翩葫蘆畫未就新花樣又鮮徒飽工
賈輩居奇日變遷人有幾分福家餘幾貫錢飾外而絮
內於身何有焉。

節飲

止酒

郭瑞齡

老翁今年六十七生平頗有劉伶癖學書學劍兩無成
博得寒氈分半席官卑職散俸無多苜蓿將來換三白
晨朝一壺晚一鍾醉倒嘗騰百憂釋那知藉酒欲銷愁
酒結成痂貯胸臆恍然自悟酒無功愁不能銷病來迫
因之止酒保我軀善釀何須說儀狄偶然宴賞來嘉賓
賭勝歡腸甘敗北爲我寄語王無功醉鄉可游不可濕
說酒二百四十字

梁同書

天地一氣耳我身亦如是氣聚人則生氣散人卽死道

家貴養氣鍊之益精髓直養而無害吾儒豈二理奈何
縱飲徒不惜身命委保嗇之不暇而乃爲酒使謂能澤
肌膚表盛必瘁裏謂能通血脈此盈或絀彼又謂風雅
助濫觴自文士借作釣詩鉤淋漓挂脣齒不然飲尸萬
一一皆陶李要知古達者名不因酒滓徒爲鴆毒媒甯
止食肉鄙不見起醉餅塊然彈丸比烝之乍浮浮肥皮
成瓠子噓氣使之然其中可知已不信試剖看童豎皆
能指粗如蠶窠攢細若蠶穴徒膈臟方寸地空洞何所
恃一朝六疾侵直入無禦抵大則鬪鬪封小亦皮骨骹
與其悔噬臍胡不戒滅趾斯言本意造罕譬實取邈莫

笑桓元子用以當監史

說酒和山舟先生

吳錫麒

春風一紙來霍然蘇病肺殷勤藥石言意乃爲我輩平生無他腸謬辱麴生愛支撐小家屋思與大戶賽濟師入腹心負痛夾肩背是惟本旣虧遂令中欲潰譬之起酵法和麴瀘成塊籠蒸作其氣外盛耗於內肥皮漲膨脰密孔攢細碎以此論腑藏菁華懼先刈空洞失所憑不疾心亦痲奈何沈湎徒至死弗知悔連岡松柏聲風雨發感慨糟邱步兵銚米汁彌勒袋幾個土饅頭中間酒人在誰歟身後名尊俎奉百代所嗟藜藿餐略要藉

沾漑摩挲小人腹斟酌君子誨舟非以溺藏食豈因噎
癢剛制謝不能柔克期勉逮不爲法士拘亦不俗客耐
嗷嗷戒醉言傲傲懲舞態提壺春鳥呼問字門生載禮
飲或庶幾三爵油油退

小飲

許楣

我性不解飲論戶則已小然頗識其趣偶復一樽倒淋
漓大酒場風雅等傭保豺號而蠶喧一醉偃如草問復
解飲不自已不能了凡事沈酣餘穠華易枯槁澹然醉
醒間得半固自好蔣春霖曰補酒詰賓筵所未及凡事一接尤能推廣
步兵昔佯狂沈湎世無對糟邱臥六旬典午婚自退高

才值暴主非酒無由晦幸茲俯仰寬不飲可卒歲飲亦
故自佳但勿筋脈遺三爵而油油不夷亦不惠

遣色

王材任燒丹歌見惑溺門

救敝下海子

顧夔璋

下海子無底止不是沈便是死烟花如霧薄如冰較海
尤覺深無涖何來姊妹服鮮衣頓使遊蜂浪蝶迷竟如
精衛思填海此恨茫茫何止期傾囊倒篋復奚惜所惜
旋窩徒自溺古來徐市去猶回一下不上空太息

老少年

王蘇

翁年六十姬十六綺甲雙周介眉祝姬年十七翁七十
倒轉年華觴七袞矍鑠哉翁少不如秉燭能作蠅頭書
宵飲人蓂葉底露晨餌斑龍頂上珠雛姬日肥翁日瘦
偶照清流面全皺春深扶杖入花叢淚眼迎風夜中嗽
君不見寒雲輕重雁來天豔煞紅鮮美少年莫漫秋殘
誇眼福霜中能得幾時妍。

鴛鏡詞

王漁洋池北偶談楚人王蘭士遊江西一

翁媪二人入祠直據上坐僕從旁列復有翁
媪匍匐入跪其前坐者怒數其罪願從者護之
數百跪者哀號乞憐曰生此不孝子不敢辭罪
願見釋當碎其鴛鴦鏡事猶可及也坐者沈吟
釋之王忽嗽發聲遂無所視晨起雨霽將行忽
有少年持一鏡入拜祠下某怪而問之曰此鴛

鴛鴦鏡漢物也視之背作鴛鴦二頭謂少年曰肯
售乎少年不可展轉問鏡忽墜地而碎少年方
驚惋某告之曰汝必有失德壞人閨門事不實
相告且有陰譴少年懼吐實乃與聖中謝氏女
約私奔期會祠中鏡即女所遺也因語以夜來
所見少年大恟恨再拜而去王視其額乃謝氏
宗祠也

錢 枚

鴛鴦生水中各自有雄雌野鳥飛鳴來安能成匹妃粲
粲深閨女生小習禮儀容色私自憐香纓着無期少年
誰家子蚤緣到中闈本自性佻達兼復習容詞我居近
同里卿年長及笄便可成密約愼莫生狐疑冶情一相
蠱遽訂粲中期開我東閣門黃金鎖歲蕤攬取匣中鏡
繫以雙紅絲背上雙鴛鴦比翼不暫離古花繡成采碧

綠丹黃縉珍重漢時月脫手竟相貽君且持此鏡入我
謝家祠明日人定後誓將出中閨便可相會固密約無
人知其日日將夕有客楚中來徘徊覓旅宿悵然入空
祠假寐不成夢月冷陰風吹瞥見翁與姥上坐張兩頤
怒呼二人來瑟縮伏階墀汝子生不肖陰來辱門楣小
家失教訓於法坐當笞列卒如伍伯撻背聲哀嘶階下
叩頭見孽子罪當治甯知亡者魂遍體生瘡痍顛碎所
貽鏡鏡破情亦離藉贖亡者罪幸可免鞭笞上坐聞此
言點首霽容威楚客聞此言四顧驚而嘻毛髮森瑟縮
幽光猶閃屍平明看戶册知是謝家祠祠前長荒草祠

後嘯怒鷗諒無居人至坐待復移時亡何少年子攬鏡
竟入祠再拜起獨立中心如有思忽然鏡墮地片片光
流離急疾不能救少年大悲摧楚客從旁呼汝行必有
虧便道夜中事冥冥誠難欺亡者罪如此生者行可知
少年色如土戰慄不自持叩頭謝客言嗟實頗有之不
圖千神怒誓將去前非卻視所貽鏡精光已紛披散在
石苔上冷氣侵人肌可憐雙鴛鴦化作輕烟飛明鏡能
鑑形灼灼辨妍媸鬼神能鑑心洞洞燭陰私寄謝少年
子視此鴛鏡詞

戒氣

戒氣歌

尤侗

古人三不惑名爲酒色財我性喜豪飲中年致疾災因
此疏麴蘖祇勝三蕉杯美人我所思其奈緣木諧一生
不二色鰥老心如灰我口不言錢錢亦不我來執鞭豈
可求屢空任瓶罍借問關西子於我何有哉惟有氣未
除魄壘費推排嗟乎時不遇慷慨以傷懷山亦復苦愁
又亦復苦哀所爲行拂亂萬變多參差事去每生悔物
來仍見乖生平疾惡嚴羣小相嫌猜已厭禪中蝨更憎
井底蛙九狐走閃爍三狗吠厓柴恨無尙方劍安得浪
沙椎願置十地獄并借六丁雷思之忽大笑斯言得毋

獸天地本無邊。吾生終有涯。往者不可挽。來者焉能追。
世網紛糾纏。猶如飄氛埃。惡聲與惡色。何足擾靈臺。君
子三白反。橫逆由爾儕。忍辱波羅密。佛言亦復佳。唾面
固自乾。尊拳豈敢回。袒裼裸裎者。油油與之偕。玉皇既
可對。乞兒也堪陪。愁眉自然解。笑口爲之開。鍊此鐵石
腸。庶保土木骸。勇哉氣矜隆。不過壯士材。藏身息舌戰。
學道在心齋。四端一時絕。方寸卽蓬萊。

嗜古

嗜古篇

吳震方

飢來資飲食。麤糲同一飽。寒至資衣被。疏布亦自好。世

人嗜古玩風俗日浮佻嘗游五都市眩目誇瓊寶周鼎
及漢玉晉唐宋眞草畫蹟妙通神筆墨羅縵縹珍怪遠
方至明月來窮島問價皆千金百鎰詫爲少求之不論
錢云以充紵縞豈知飢寒人催呼迫枯槁輟此一物資
百室稅可了所以古聖王賤奇異淫巧

贗骨董

邵長蘅

閩門古吳趨陳椽如鱗比骨董大紛紜請從書畫起鐵
石充逸少朱繇作道子用子瞻語當時已雜糅近來益幻詭

好手不自運臨筆取形似牛馬署戴鞞山水大小李董
巨至唐伏一一供樵儼蘇黃字廓填唐宋碣磨洗藏經

熏煙煤宣和指印璽名重價易售千金尋常耳近派重
華亭插標遍井里不意翰墨場駟僮乃爾爾次復辨鼎
彝彷彿秦漢字藥鑄出斑駁紅綠紛可喜柴汝官哥定
直亦璠璣比貴人負賞鑿金多購未已真者豈能多贖
物乃填委徇耳不貴自世事盡如此

骨董

鄭燮

末世好骨董共爲人所欺千金買書畫百金爲裝池缺
角古玉印銅章盤龜螭烏几研銅雀象牀燒金猊一杯
一尊詳按圖辨款儀鈎深索遠求到老如狂癡骨月起
訟獄朋友生猜疑方其富貴日價值千萬奇及其貧賤

來不足換餅飡我有大古器世人苦不知伏羲畫八卦
文周孔繫辭洛書著洪範夏禹傳商箕東山七月篇斑
駁何陸離是皆上古物三代卽次之不用一錢買滿架
堆離披乃其最下者韓文李杜詩用以養德行壽考百
歲期用以治天下百族歸淳熙大古不肯好逐逐流俗
爲東家宣德爐西家成化甕盲人寶陋物惟下愚不移

吳趨吟 贗骨董

孫源湘

青天明月不可假其餘紛紛多贗者秦時銅鼎漢玉尊
阿房宮甄未央瓦戴嵩老牛韓幹馬紙墨所爲尤古雅
山塘畫閣對水開清陰蔽蔽搖綠槐湘簾裴几位貼妥

香煙茗盃紛安排。千金下至百金值。索價無常視其客。
十日不得名一錢。有時一錢遂獲百塞天。金銀氣夜半
入官府。大用買高爵。小用買歌舞。餘者買此示好古。不
見世家舊物塵埃生。玉甕汲水當瓦鑪。沿街喚遍無人
買。還付兒童去換餿。

燕臺
樂府 贗骨董

梁紹壬

世間何者爲古物。尺五青天一明月。世間何者爲眞靈。
日星河嶽賢聖經。彼肉食者何儉父。以假作眞新作古。
遂令市井售利徒。窮極妝點相欺誣。先秦銅鼎漢玉尊。
阿房宮甄未央。瓦李斯古篆。右軍書戴嵩老牛。韓幹馬。

湘簾斐几清絕塵一一帖妥而橫陳若者商周若虞夏
平視羣材高索價吁嗟乎我生已後三千年眼光那及
前人前矧乃寶物出非偶鬼護神呵妖魅守書言用器
惟求新當王者貴物最珍義王以前瓦與石縱在人間
何足惜君不見貧兒乞食善解嘲原憲之杖顏回瓢又
不見奇珍從古無世壽玉璽而今已非舊

賭博

高岑誰氏子篇見貧賤門

博徒

憫俗詩
之一

吳文暉

博戲古亦有迄今何紛綸稱名日以多制器日以新相

喚相呼日微。逐野狐迷人無此酷。一場縱博幾家貧。後車誰鑿前車覆。長官豈不禁遣吏布教言。諄諄勸改轍。宛若流涕宣朝來坐衙。抑何怒捕得博徒。兼博具屢教。不悛罪難恕。後堂照耀紅羅毼。退與賓客還呼盧。

吳中吟

牧奴戲

錢維喬

一擲輕百萬豪舉。亦得名聖賢戒。冥然博奕差可營。揆之惜陰義。要非先民程。無益害有益。勝敗徒爲爭。乞假吝一錢。金注囊甘傾。中堂張羅毼。燒燭呼其朋。但云夜未艾。豈識雞將鳴。酒酣興未已。餘貲及杯羹。隣有餓死孀。叩門方莫應。

洪古銓閩中花會詩見會匪門

潮風打花會

做賭博也潮俗賭風莫盛於花會厲禁雖嚴旋革旋復蓋誘以厚利趨之

者多敗家喪身會莫之悔是宜儆也

黃安濤

打花會花門三十六三日又翻覆空花待從何處捉一
錢之利十倍三姦巧設餌愚夫貪一人偶得眾人慕坑
盡長平那復悟夜乞夢朝求神神肯佑汝夢若告汝不
知廠中餓死多少人初一起三十止送汝蓋棺一張紙
打花會者寫批投廠兼按日存記廠中故
諺有紙棺材之語謂好之者必自斃也

武林樂府搖攤

陳春曉

搖攤復搖攤長夜何漫漫釵光與鬢影雜坐燈前歡搖

攤更壓攤負易而勝難孤注決青龍詎料竟白虎有如
戰敗軍垂頭氣彫沮十年百萬金耗棄等糞土歎息銅
山頽漏卮悔莫補已將華屋付他人那惜良田貽祖父
室人交謫淚如雨典到嫁時衣太苦出門郎又搖攤去
厨下無煙炊斷午。

郭儀霄足可惜篇第三章見惑溺門

格言名論補

古歌謠辭錄

四

張維屏

人皆有情天下太平

太平歌

爾勿恃強轉眼夕陽北邙荒郊上有牛羊

醒世歌

我手十指有長有短如何使人要我意滿

長短歌

兵不在衆在乎用命共膽同心寡可制勝

衆寡歌

卮言

葆真哀樂

二首

鮑

臺

虛室乃生白明鏡不受塵立身生之初瑩然葆我真一
物爲掩蔽方寸生荆棘痛癢不自覺感物無由因所以
岐黃書麻木爲不仁

日出東方紅日入西山黃日出氣和悅日落氣悽愴乃
知哀樂端倪之自穹蒼萬古一歌哭範圍陰與陽達者
爲之飾反者爲淫傷

詠懷雜詩

溫訓

論語讀終身時時念三畏人惟無所畏遂至無所忌小
人知畏威貴以刑佐治君子首畏天大人在其次至於
聖人言垂訓示萬世理本如日星切實贊天地古來大
奸雄亦知畏清議三綱與五常賴以勿失墜言敬尚和
平言畏乃惕厲人惟有所畏庶幾不敢肆

釋典千萬部心折惟兩言兩言曰因緣先聖所未宣荷

無因與緣至親亦等閒果有因與緣雖疎如弟記每有
深相知宛若舊好敦更有未識面愛慕縈心魂不解何
以然此中有因緣倫類多如斯不獨夫婦然

顏子三十二壽同天地長彭祖八百歲此言殊荒唐命
長無可稱雖彭亦如殤昔者里有翁耄耄猶康強有口
能飲食有體能冠裳當其居華屋已似歸山岡吁嗟人
間世大夢同一場夢同中有異各各留心光心光死不
滅心血於此藏大者爲道德小者爲文章

讀世說新語高世孫遠公問答有感 吳國俊

松樹故楚楚終不爲梁棟楓柳雖合圍又苦無所用因

悟世間人學識須珍重赤水騰珠光丹山翔鳴鳳龍辱
何足驚榮枯原似夢但期質地佳毋因時遇痛

讀書補

寄感

射鷹樓詩話采錄
五古數首之四

董桂敷

萬物萬種色一雲一情狀造化真文章本自無定相渾
灑四代書魏魏九霄上發經更四手各各見德豈風雅
正變音分塗成絕唱代有作者出皆然絕依傍胡爲後
世文愛畫葫蘆據更於拜獻資一轍範趨向天駒縱超
羣何由顯雄壯

鯉馨潮州傲龍求瀧岡碑感物有真精豈在空文辭如

何薄識子爭誇華藻擗耳目愚一世心胸積萬欺兒童
甫弄筆粉飾遞相師焉能當大事開懷釋羣疑陋哉揚
子雲篆刻後賢嗤偉矣陸宣公一詔天下悲

約國有樂地羸界無恬機多財石季倫死愧榮啟期倫
通天地人或昧心肝脾讀書僅貪多入世羞爲雌不必
大聖賢有識嘲其癡未覩秦漢庸焉識唐虞奇

樂哉吾此遊客問來何自爲敢牀頭書周官卷第二其
中皆井田桑麻徧樹蕪原禾映溝塍牧豎雜婦稚牛羊
墟里間雞豚籬落際靜聞織績聲動見和親意工商循
法矩士民敦孝悌客曰樂哉國遠勝桃源地

論文

何長詔

文章貴生氣變化不可測奈何羣兒愚迂拘守成格腔
調日以多性情日以塞我讀古人詩大都少依傍脫穎
鋒彌鋸破空神愈王莊周夢蝴蝶栩栩而蘧蘧列子御
風行其妙當何如

論學問

曾世霖

學問尙精專研摩貴純一經學與詞章華實本異室許
鄭徐庾儔各具千秋筆專力則必精分途恐兩失

讀書

彭兆蓀

人讀等身書如將兵十萬兵多行慮難書多語愁蔓何

以節宣之一心制衆亂不見陸士衡才富轉爲患亦有
淮陰侯多多乃益辦要以我用書勿爲書所絆

交際補

雜詩

二十首
之一

朱彝尊

有酒斯鼓缶吹噓必和箎同調定見憐一心不相離古
人重久要隙末非所宜谷風思小怨大德反棄遺新交
不如故君子當三思請看蘇子卿豈絕李騫期

莫去草行

顧我錡

莫去草草無惡世俗紛紛情更薄君不見竇嬰門下客
如林一朝解散同葉落又不見翟公紅騎接朱輪俄然

大署傷離索乃知富貴皆炙手呼吸便覺春華灼乃知
權位一日非不減秋風破殘穉玳簪珠履客三千覆雨
翻雲如隔膜莫去草草無惡世俗紛紛情更薄

遠色補

詠懷詩

張維屏

天心最好生與以生。生理陰陽雨相違。人世大歡喜。奈
何圖歡娛。不顧耗骨髓。甚者如畋漁。縱恣不知止。傾國
與亡身。大半因女子。天公本好生。世人乃好死。何如玩
名花。以花當彼美。香國卽柔鄉。吾將老於此。

賭博補

花會歎

黃貽楫

賭博害人，心花會爲尤毒。三十六門中，儼是銷金局。士農及工，買顛癡，紛逐欲賭，爲姦邪媒。此尤敗風俗，可憐閩閩中，貪心多，被辱誰學。朱文公治閩如治蜀。

林昌彝射鷹樓詩話曰：人心風俗之壞，山於賭博，賭博之害莫甚於花會。花會之設，聚賭山場，不下千人，壓會之人不必親至，著人走信通風，往返奔命，直達閩閩土農工商，棄其業而受其恐，迨輸聚次，每輕生自盡，或有爲勢家所迫，爲盜爲倡，官嚴禁而奸徒不斂，迹者罔利，旣多不惜，使費衙門兵役爲之耳目。官有舉動，彼已周知，故率虛擊而不能實捕，串通勾結，日滋日盛。今欲禁之，惟先出示，著各鄉耆地保率衆擒拏一村，有匪徒聚衆掛巴則一村共舉械鳴鑼逐之，各村皆然，使無容身之處，其局不散，自散矣。掛巴之處，雖在高山，水面未有不屬鄉村，如有在其聚衆，卽是與彼勾通，擒其鄉長，毀其牆屋，此法去莠安

良誠保民
之善政也

附載林昌發詩話一則○學者知縱酒宿娼賭博之
當戒不知說閑話看閑書管閑事之亦當戒也前三
事知自愛者能決去不爲後三事若無害而廢業敗
德生禍不異其伏毒不覺及覺已難追悔此張僂若
蒿庵閒話語也布衣陳鳳翔有句云
人生不少當勤業莫學閑人度日來

格言名論補

座右銘

張維屏國朝詩人徵略采句陸隴其
云公弱冠館嘉善李氏時作

洪範六極弱居其一所貴讀書變化氣質當斷不繼爾

自詒賦

生者待汝養死者待汝葬天下後世待汝治汝毋或輕
爾身以殉無涯之慾而喪厥志

續補終